



Tal curtîl dai Pontons dopo la prime vuere grande a jerin a stâ cuatri fameis, chê di Cico, chê di Bidin, chê di Fresc e che di Poltane.

Ducj a vevin la vacjute, cualchi cjamput e un stric di tiere par ort dongje il sacrosant gjalinâr.

Poltane nol veve nie, nancje pantianis a cori pes busis de puarte o sul solâr; ogni tant cualchidune e rivave in esplorazion ta panarie par dopo tornâ di dulà che e jere rivade plui magre e scuintiade di prime, cence contâ il risi di passâ jê par prodot alimentâr.

Poltane al veve imparât e po mantignût il vizi dal fum di militâr, ma jessint al vert al cumbinave cun cjarte di calendari che siôr Sisto ustîr i procurave man man che al disniçave i dîs.

In chest sfueut al rodolave la scusse masanade de vît di bacò tirade a bersò fûr puarte di cjase; nol jere paragon cul sigar toscan fumât sot naie, ma come che al dîs la detule, cuant che no je une gjaline bolide a ven buine ancje une çore.

Dentri dal gjalinâr di Cico lis gjalinis a cjantavin di spes a visâ dal ûf poiât, senochè a Poltane i passe pal cjâf di robâ i ûfs par cjoli spagnolets...

Si invie cussì te brute intenzion, scuindint il robât tra cjâf e cjapiel, ma stâ di fat che Cico lu suspiete de cjative azion... "Strani chel fum, strani l'odôr, plui strani poltane che al fume di siôr..."

Cussì scuviert l'ingjan al spiete il lari a un pas obleât, i da une manade disore il cjapiel fasint di chei ûfs un licôr di fertaie.

Dai cjavêi a la barbe fin ancje sul cuel cuvierzint la muse al puest da fressorie!

Cence savêlu cico e poltane, l'invenzion dal shampo la firmavin ta storie.

di Luciano Marinig iw3 qrc